



**Kalaallit Nunaannut isertitaqarfiusinnaasunik nutaanik ataatsimut misissueqqullugit, nunap aningaasaqarneranik nukittorsaaniisaq aammalu Danmarkimiit ataatsimoortumik tapiissutitigut (bloktilskud) pinngitsuuisinnaassutsip annikillissarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup inernerera UPA27 nallertinnagu Inatsisartunut agguanneqassaaq.**

(Inatsisartunut ilaasortaq Erik Jensen, Siumut)

(Siullermeerineq)

Inatsisartunut ilaasortap Erik Jensen Siumumeersup siunnersuutaannut Demokraatiniik imaattumik oqaaseqarfigissavarput.

Nuna innuttaminut pitsaasumik periarfissaqartitsisoq, nuna sunik periarfissaqarneranik, sunik pisuussuteqarneranik - taakkulu qanoq annertunerpaamik nunap inuinit iluaqutissanngortinneqarnissaannik tunngaveqarput.

Nunatsinni aningaasarsiornikkut pitsaanerusumik siuariartortitsinissaq pisuussutit pigisatsinnit killilersugaanngilaq, nuna pisuussuterpassuaqartoq nunagigatsigu, pisuussutilli pigisavut pitsaasumik innuttaminut iluaquusiissapata tamassumap iluatsinnissaassut nalilersuisuarnissaq, nukissamik eqqortumik atuinissaq, eqqummaarinnessarlu tamatsinnut piunasaqarpoq. Apeqqu taanna uagutsinniinnaq akissutissarsiffiginiassallugu naammangilaq – Nunanik allanik peqateqarneq qanoq niueqateqarusunneq nunattalu aningaasaliiffiginissaannut kajumernartuuneranut tunngassuteqarpoq.

- Siullertut ilinniartitaaneq, piginnaasanik ineriartortitsiuarneq sulisinnaassuseq sunut tamanut qitiuvoq. ilinniartitaaneq nunatta pisuussutaannut minnerunngitsumillu pisariaqartitaannut naapertuuttumik ilusilersugaq.

- Aalisarneq nunatta aningaasarsiornikerani pingaarnerpaatut inissisimasooq tamatigut pitsaasunik tunngaveqarluni ingerlatsiviunissaanut sinaakkutit pitsaasut – ineriartornissamut periarfissaqartitsisut. Aalisakkat nunatsinni sapinngisaq naapertorlugu naleqarnerulersinneqarnissaannut pivusorsiortumik ineriartortinneqartoq.

- Aatsitassarsiorneq – Suliffissanik innuttaasunut aningaasarsiornikkut ineriartornissaannut periarfissiilluartoq qularnaarsimajuassallugu.



- Mittarfissuit sanaartorneqarnerat nunatta aningaasarsiornikkut Assigiinngisitaarnerusumik inissinnisaannut tunngassuteqarput. Ullormiik ullormut piariinngikkaluarlutik innuttaasunit ineriartortinneqartussat, nunap inuisa namminneq piginnittuullutik ineriartorfissaat.
- Aningaasarsiorneq annerusoq ineriartussappat attaveqaasersuutitsinnut annertuumik aamma tunngassuteqarput. Nunarput aningaasaliiffigissallugu pilerinartuussappat tikikkuminarsaaneq attaveqaatillu qitiusorujussuarmik inissisimapput. Nuna isoratoqisoq ullut tamaasa innuttaminut unammillernartorpassuarnik misigiffigisarparput.
- Nukissaq annertoq piujuartitsinermik tunngaveqartoq maani nunatsinni pigaarput, tamannali aamma piunasaqarpoq nunatta aningaasaliiffiginissaannut pilerinartuunissaannik.
- Nuna suliffeqarfeeqqanut nutaaliornissamik pitsaasumik periarfissiisoq tapersersuisorlu.
- Nunatta sulisinnaassutsikkut nukittuumik inissisimanissaa, matuersaatinut pingaarnerpaanut ilaapput.
- Nunanut allanut oqartussaaffiup nukittorsarneqartariaqartoq – Aningaasaq nutaaq isernavianningimmat nunanik allanik peqateqanngikkutta, pitsaasunik isumaqatigiissusiorneq nukissanik pitsaasunik peqartitsinermiippoq, taamaammat kukkunerussanngilaq nunanut allanut oqartussaaffitta nukittunerusumik inissinneqarnissaa pisariaqavissoq oqaatigissallugu.

2024-imi partiit tallimaasut akornanni sisamat tunuliaqtsigaannik 2024-imiit 2033-imut Nunatta Nunanut Allanut, Sillimaniarnermut Illersornissamullu Politikkissaannut periusissiaq saqqummiunneqarpoq. Tassani nunatta nunanut allanut ersareqqissaartumik qanoq periuseqarluni ineriartortitserusunneranik sunillu naleqartitaqarneranik saqqummersitsivoq. Taamaaliorpugut pissutsitoqqat ukiorpassuarni apeqquserneqarpallaaratik periuserineqartut sutigut allangortillugit nunatsinnut pissutsinullu allangortunut naleqqussarfiusariaqarnerat takullugu. Nunat qaninnerusagut qanoq iliornikkut annertunerusumik suleqatigisinnaavagut uagutsinnut iluaqutaasumik.

Aningaasarsiornikkut pitsaanagerusumut inissinnissat tamatsinnut kissaataavoq, soorlu aamma “Attassiinnarnissamut ineriartortitsinermullu pilersaarut” taamak siunnerfeqartoq.



Taamak oqaaseqarluta Naalakkersuisut allannguutissatut siunnersuutaat paasilluarparput taperserlugulu, siunnersuullu aappassaaneerneqartinnagu ataatsimiitsitaliamut susassaqartumut innersuullugu.